



Suenter che las dunnas èn vegnidas blessadas hai dà diversas demonstraiziuns.

KEYSTONE

Violenza cunter dunnas: Geneva sut schoc

■ (rtr) A Geneva èn vegnidas blessadas tschintg dunnas dad ina gruppa dad umens. Ina dad ellas è anc adina en il coma. Il cas procura per atenziun en tut la Svizra. Il schoc è grond, dentant n'è il cas a Geneva betg unic. **Violenza cunter dunnas capita mintga di en Svizra – a chasa sco er en la publicità.** Igl è in fatg che la violenza dad umens cunter dunnas è bler pli auta che la violenza da dunnas cunter umens. Var 40 giadas per di stoppia la polizia intervegnir pervi da violenza a chasa. Sco che *Sophie Achermann* di è quai en media mintga 35 minutas e las unfrendas èn quasi adina dunnas. Ella è manadra da fatschenta dad Alliance F, l'unioni da tetg da las organisaziuns da dunnas. La violenza a chasa è en Svizra in grond problem. Sulettamain pervi da violenza a chasa moran mintg'onn 25 persunas, scriva il Biro federal d'egualità tranter umens e dunnas. Dentant er adina pli savens sa defendan dunnas sch'i va per la violenza en la publicità. Tar eveniments gronds, sco per exempel a la Street Parade a Turitg, datti adina dapli dunnas che raquintan ch'i vegnian violadas tranter tut la gliעד.

Violenza senza flatgs blaus

In grond problem saja tenor Achermann era che la violenza cunter dunnas vegnia adina pli gronda en l'internet. Dunnas

vegnian attatgadas sch'ellas s'exponian, di ella. Ils commentaris nauschs na sa tractian betg dal cuntegn, mabain dal vesair or, dal corp u da la vestgadira. Ils commentaris sajan savens era pli dirs che quels ch'umens survegnian. Tut facturs che fetschian vegnir malsegiras las dunnas e cun quai studegian ellas in per giadas sch'ellas veglian propi s'engaschar per ina chaussa u betg. Sche dunnas s'exponan en las medias u en la rait vegnan ellas per part attatgadas enorm. La gronda part da las dunnas studegian perquai in per giadas sch'i vulan s'exponer, per exempel en la politica.

La violenza vegnia però er promovida en la rait, declera Achermann vinavant. I dettia paginas da medias socialas nua ch'umens discutian co ch'els veglian violar dunnas. Era dettia adina pli savens purtrets che glorifitgeschian la violenza e promovian quella. In exempel haja dà cura che la chantadura Rhianna saja vegnida pitgada da ses partenari. Lura sajan ils purtrets dad ella cursads en la rait. Divers commentaris hajan celebrà ch'ella saja vegnida patengada ed han ludà il delict da ses partenari.

Be perquai ch'ina dunna n'ha betg feridas na vul quai betg dir ch'ella na vegnia betg violada. I dat ina pluna variantas da violenza. En ils blers cas vegnia avant ina cumbinaziun da differentas furmas da violenza.

Politica conscianta dal problem

L'onn passà è vegnida ratifitgada la convenziun dad Istanbul – ina convenziun cunter violenza a chasa. En l'ultima sesiun ha il cussegl dals chantuns decis da rinforzar la protecziun per victimas, quai che pertutga violenza a chasa e stalking, perquai che stalking explicit n'è per il mument betg in delict en Svizra. Ils 8 d'avust è ina dunna vegnida patengada las tschintg a bun'ura dad ina gruppa dad umens avant in club a Geneva. Silsuenter vulevan quatter autras dunnas gidar – però er ellas èn vegnidas attatgadas. Duas da las dunnas han stui ir en l'ospital cun blessuras grevas al chau. Ina dunna è anc adina en il coma.

Ina gronda part dals delinquents supponids è identifitgada, ha communitgà la Procura publica da Geneva. Tar trais dals umens èsi segir ch'els èn stads participads a l'attatga. Tar dus fin trais ulteriurs ha la polizia in ferm suspect ch'els hajan commess il delict. Suenter che las dunnas èn vegnidas blessadas hai dà diversas demonstraiziuns. Gia il di suenter l'attatga èn var 100 persunas idas sin las vias da Geneva a demonstrar encunter la violenza cunter dunnas. La dumengia suenter haja dà demonstraiziuns a Berna, Basilea, Turitg e Losanna. Sco acciun da protest è era vegnì lantschà il hashtag #allefuereine #toutespourune.